



**Inuussutissarsiornermut Suliffeqarnermullu Naalakkersuisoqarfik**  
 Naalakkersuisoq  
**Landsstyremrådet for Erhverv og Arbejdsmarked**  
 Landsstyremedlemmet  
**Ministry of Industry and Labour**  
 The Minister

Inatsisartunut ilaasortaq Marie Fleischer

## Asasara Marie Fleischer

Ukiuni aggersuni inuussutissarsiortut unammilligassaannut nutaanut tunngatillugu apeqqtinnut eqqarsaasersuutinnullu soqutiginarturnut qujanaq. Unammilligassanut nutaanut Naalakkersuisut qilanaarput inuiaqatigiinnilu nalinginnaasumik peqqinnartumik ajunngitsumillu ineriartornermut takussutissatut isigalugit. Takornariartitsineranut aamma nunami inuussutissarsiutinut siunnersuisarnerup ataatsimut katersorneqarnissaa aamma Qaasuitsup Kommuniata toqqarsimammagu qujanartoq isumaqatigilluinnarpakkit, suliniuteqarfiit taakku marluk akornanni sunniiveqatigiinnerit amerlanapaajunissaat qulakkeerniarlugu.

Inuussutissarsiutinik ineriartortitsinerup aningaasalersornissaa eqqarsaatigalugu eqqaamassavarput annertunerpaartaat Naalakkersuisuniit imaluunniit kommunerujussuarniit pissarsiarineqartussaangimmata, inuussutissarsiortuniilli pissarsiarineqartariaqarmata, tassunga ilanngullugu inuussutissarsiutit malitsigisat ineriartortinneqarneri. Inuussutissarsiutilli peqqinnartumik annerujuartuinnartumillu ineriartornissaannut toqqammavigisat pitsaanerpaat pilersinnissaannut Naalakkersuisut suliassaqarput. Ilumoorpoq kommunerujussuit pilersinnerisigut nunap immikkoortui amerlanernik piginnaasaqalissammata taamaattumillu pissusissamisoorluinnarluni inuussutissarsiutit pitsaanerpaamik toqqammaveqarnissaasa qulakkeerneqarnissaannut naleqqiullugu kommunerujussuit aamma siunissami annertunerusumik akisussaaffeqalissallutik. Naak inuussutissarsiutinut tunngasuni suliat kommuninut nuunneqarnissaat pillugu iluarsaasseqqinnermi isumaliutissiissut toqqaannartumik kaammattuuteqanngikkaluartoq.

2009-imut Aningaasanut inatsisip akuersissutigineqarneratigut kommunerujussuarni takornariartitsineri inuussutissarsiutinullu siunnersuisarnerup pilersinnissaanut ingerlanneqarnissaanullu aningaasanik immikkoortitsisoqarpoq. Tamanna 2009-mi Inuussutissarsiornermut Suliffeqarnermullu Naalakkersuisoqarfiup aamma kommunerujussuit pineqartut akornanni isumaqatigiissuteqarnikkut pissaaq. Siunnersuisarfimmik ataatsimik arlalinnilluunniit pilersitsinissamut kommunit aningaasanik pissarsinissaat Naalakkersuisut sulissutigisimavaat, taamaalilluni takornariartitsineranut inuussutissarsiutinullu siunnersuisarneq atuisut ataasiakkaat sapinngisamik

30. december 2008  
 Sags.nr. 2008-014444  
 Dok.nr. 124989

Postboks 1601  
 3900 Nuuk  
 Oq/tel +299 34 50 00  
 Fax +299 32 56 00  
 ip@gh.gl  
 www.nanoq.gl

tikillugit pisinnaalerluni. Taamaalilluni kommunit ataasiakkaat kommunerujussuaq tamakkerlugu siunnersuineramik ingerlatsivigineqarnissaanik qulakkeerinnittumik aaqqissuussisussaapput. Nuna tamakkerlugu inuussutissarsiutinik siuarsaanermik aaqqissuussinerni kommunit aallaaviatigut aqutsisuusussaannngillat. Naalackersuisoqarfiulli aamma kommunerujussuit akornanni isumaqatigiissummi qulaani taaneqartumi kommunit aamma Nunatsinni Takornariartitsinermut Inuussutissarsiornermullu Siunnersuisoqatigiit (NTIS)-ip akornanni akisussaaffiit qanoq piviusunngortikkusunnerlugit kommunit nassuiaateqartussaapput, tassunga ilanngullugu inuussutissarsiutinik siuarsaanermik aaqqissuussinerit suut nammineq atussallugit naleqquttuunersut erseqqissassallugit.

Takornariartitsinermut inuussutissarsiutinullu siunnersuisarfiit nutaat NTIS eqiteriffigalugit kattuffiup ilaatut Naalackersuisunit isigineqarput. Nuna tamakkerlugu takornariartitsinermut inuussutissarsiutinullu siunnersuisoqatigiittut ingerlatsinermi NTIS taamaalilluni ilaatigut nuna tamakkerlugu ataatsimut pilerisaarinikkut suliniuteqarneq isumannaassavaa tassungalu atatillugu suliffeqarfinnut anginerusunut inuussutissarsiornikkut siunnersuineramik, nunani assigiinngitsuni suliniutitigut suleqatigiinnerit (NPP, NORA il.il.) iluini immikkut ilisimasalittut siunnersuineramik suliaqassalluni.

Pisortat suliniutaasa assigiinngitsut akornanni annerpaamik sunniiveqatigiinnissap qulakkeerneqarnissaa pingaaruteqartorujussuuvoq, tamanna nuna tamakkerlugu imaluunniit kommunerujussuarmi suliniutaanera apeqqutaatinnagu. Allanut naleqqiullugu nukit killeqartillugit suleqatigiinnissarput pingaaruteqarpoq qaffasissutsillu assigiinngitsut akornanni patajaatsumik atasinnaasumillu suliat agguataarneqarnissaat nassaaralugu. Sulinerup pitsaanerpaamik agguarneqarnissaanik nassaarniarnermi peqataasut tamarmik peqataatinnissaat Naalackersuisut taamaalillutik pingaartippaat. Naak NTIS kattuffittut eqiteriffiugaluartoq, isumaqatigiissulli siunnersuinermut tunngasuummat aamma tulluassaaq Greenland Venture (GV) kattuffimmut pineqartumut ilaassappat taamaalillunilu GV-p kommunerujussuillu akornanni ataqatigiinneruneq qularnaarneqarluni.

Qulaani saqqummiussat tunngavigalugit neriuppunga apeqqutitit akissuteqarfigineqartut. Soorlu aamma illit allattutit maannakkut allanngortiterinerit nalaaniippugut, allaffissornerlu taamaalilluni inuiaqatigiinni ineriartornermut ingerlaavartumik naleqqussartariaqarluni.

Inussiarnersumik inuulluaqqusillunga

Siverth K. Heilmann  
Naalackersuisoq